

**БУХОРОДА БАНКЛАР ФАОЛИЯТИ  
(XIX аср охири ва XX асрнинг биринчи ярми)**<https://doi.org/10.53885/edinres.2022.9.09.001>

Амонова Феруза Саъдуллаевна,

тарих фанлари бўйича фалсафа доктори PhD, Низомий номидаги  
Тошкент давлат педагогика университети. feruza\_amonova88@mail.ru  
<https://orcid.org/0000-0001-9236-9857>

*Аннотация. Ушбу мақолада XIX аср охири ва XX асрнинг биринчи ярмида Бухорода фаолият олиб борган банклар ва уларнинг бозор иқтисодиётни ривожлантиришидаги иштироки, давлат банклари билан бир қаторда тижорат, қишлоқ хўжалик, коммунал банклар ва бошқа миллий банклар фаолияти, Бухорода хусусий тадбиркорлар ва маҳаллий сармоядорларни давлат банклари орқали қўллаб-қувватлаш механизмининг жорий этилиши архив ҳужжатлари ва тарихий адабиётларнинг қиёсий таҳлили асосида ёзилган.*

*Савдо ва тижоратнинг ривожланишига сабаб бўладиган омилларнинг энг муҳими банк ва биржалардир. Бозор иқтисодиёти шароитида пул муомаласини таъминлашда банклар муҳим рол ўйнаган. Банклар пул маблағларини тўплаш, жойлаштириш ва уларнинг ҳаракатини тартибга солиш билан шугулланувчи иқтисодий муассасадир. Ҳар қандай мамлакат иқтисодиётининг таянадиган асосий устунларидан бири банк бўлиб, молиявий жиҳатдан мустаҳкам ва барқарор фаолият кўрсатувчи банк тизими ҳисобланади. Шунинг учун мустақил давлатнинг ижтимоий-иқтисодий ривожланиш даражаси ва келажакдаги тараққиёти аввало мазкур мамлакатда барпо этилган ва мунтазам равишда такомиллаштирилиб бориладиган банк тизимининг фаолиятига боғлиқдир. Бозор иқтисодиёти шароитида банк тизими энг зарур жамоатчилик муассасалари тизимларидан бири экан, ҳар қандай банкнинг муваффақиятсизлиги бутун жамият миқёсида пул таклифи қисқариши, тўлов тизими бузилиши ҳамда ҳукумат йирик ва қутилмаган мажбуриятларининг вужудга келиши каби салбий макроиқтисодий оқибатларга олиб келиши мумкин.*

**ДЕЯТЕЛЬНОСТЬ БАНКОВ В БУХАРЕ  
(конец XIX века - первая половина XX века)**

Амонова Феруза Саъдуллаевна

доктор философии по истории PhD, Ташкентский  
государственный педагогический университет имени Низами,

*Аннотация. В данной статье банки, действовавшие в Бухаре в конце XIX века и первой половине XX века и их участие в развитии рыночной экономики, деятельность коммерческих, сельскохозяйственных, коммунальных банков и других национальных банков наряду с государственными банками, поддержка частных предпринимателей и*

*местных инвесторов в Бухаре через государственные банки - введение механизма поддержки написано на основе сравнительного анализа архивных документов и исторической литературы.*

*Важнейшими факторами, вызывающими развитие торговли и коммерции, являются банки и фондовые биржи. Банки играли важную роль в обеспечении денежного обращения в условиях рыночной экономики. Банки - это экономические институты, которые собирают, депонируют и регулируют их движение. Одним из основных столпов экономики любой страны является банк, представляющий собой финансово устойчивую и устойчивую банковскую систему. Поэтому уровень социально-экономического развития и будущего развития независимой страны зависит прежде всего от функционирования банковской системы, созданной и регулярно совершенствуемой в этой стране. Поскольку банковская система является одним из важнейших государственных институтов в рыночной экономике, крах любого банка может иметь негативные макроэкономические последствия, такие как сокращение денежной массы, нарушение работы платежной системы, появление крупных и неожиданных государственных обязательств.*

### **ACTIVITY OF BANKS IN BUKHARA (the end of XIX and first half of XX century)**

*Amonova Feruza Sa'dullayevna*

*doctor of philosophy in history PhD, Tashkent state pedagogical  
university named after Nizami, feruza\_amonova88@mail.ru*

*<https://orcid.org/0000-0001-9236-9857>*

---

*Abstract. In this article, the banks that operated in Bukhara at the end of the XIX century and the first half of the XX century and their participation in the development of the market economy, the activities of commercial, agricultural, communal banks and other national banks along with state banks, supporting private entrepreneurs and local investors in Bukhara through state banks - the introduction of the support mechanism is written on the basis of a comparative analysis of archival documents and historical literature.*

*The most important factors that cause the development of trade and commerce are banks and stock exchanges. Banks played an important role in ensuring money circulation in the market economy. Banks are economic institutions that collect, deposit and regulate their movement. One of the main pillars of the economy of any country is the bank, which is a financially sound and stable banking system. Therefore, the level of socio-economic development and future development of an independent country depends primarily on the functioning of the banking system established and regularly improved in this country. As the banking system is one of the most essential public institutions in a market economy, the failure of any bank can lead to negative macroeconomic consequences, such as a reduction in the money supply, disruption of the payment system, and the emergence of large and*

*unexpected government liabilities.*

*Keywords:* банк, кредит, ссуда, тадбиркор, фирма, завод, ширкат, савдо уйи.

*Ключевые слова.* банк, кредит, ссуда, предприниматель, фирма, фабрика, торговый дом.

*Keywords.* bank, credit, loan, entrepreneur, company, factory, firm, trading house.

**Кириш ва долзарблиги.** Ҳар қандай мамлакат иқтисодиётининг таянадиган асосий устунларидан бири молия соҳаси бўлиб, иқтисодий жиҳатдан мустаҳкам ва барқарор фаолият кўрсатувчи тизим банклар ҳисобланади. Россия банкларининг Ўрта Осиёга, жумладан, Бухоро амирлиги ҳудудига кириб келиши маҳаллий тадбиркорлар билан биргаликда рус фирма ва жамиятларининг ўзаро шерикчилик алоқаларини кенгайтишига, амирликда вужудга келган завод ва корхоналарни ривожлантириш ва маблағ билан таъминлашда муҳим роль ўйнади.

XIX аср охири ва XX асрнинг биринчи ярми Бухоро амирлигида банк билан муомила қилмаган савдогар санокли кишиларни ташкил қилган. Онгли савдогар учун банклар ҳаво ва сувдек муҳим аҳамиятга эга бўлган. Бу даврдаги банк соҳасида олиб борилган ислохотлардан шуни билиш мумкинки, банклар уч турга бўлиниб фаолият олиб борган. Биринчиси давлат банкида пули бўлган ва қўлида пули бўла туриб уни ўзи ишлата олмайдиган кишиларни ортиқча пулларини фойда йўлида сақлаб бериш учун давлат банкига қўйилган. Иккинчи акционерлик банклари бўлиб, қўлида ортиқча сармояси бўлган, кам фойдага қаноат қилмайдиган кишилар томонидан акция воситаси билан сармоя йиғиб олувчи банклар. Учинчи тури жамият ва заёмли кредит банклари бўлиб, ўз аъзолари сармоясига бошқа банкларга нисбатан ортиқроқ миқдорда фоиз тўлаган банклар киради.

Рус савдогарлари учун Бухоро амирлиги, БХСР ҳудудларида эркин ҳаракатланиш – савдо фаолиятини олиб бориш, ўз карвонсаройларига эга бўлиш ва қўчмас мулклар сотиб олиш ҳуқуқларининг берилиши қатор Россия халқаро, минтақавий ва хусусий банклари филиалларининг очилиши ва шу кабилар аслида Бухоро амирлари ва БХСРнинг мутлақ ҳукмдорлик мақоми чеклаб қўйилганлигини кўрсатар эди. Империя ва совет ҳукуматининг иқтисодий соҳада амалга оширилган ислохотлари натижасида ҳудудда акциядорлик – тижорат банкларининг бўлимлари кўпая бошланди. Жаҳонда бозор муносабатлари шароитидаги хўжалик юритиш жараёнлари Россия империясига ҳам ўз таъсирини ўтказиб, ишлаб чиқариш, савдо, кредит ва бошқа соҳаларда янгича ёндашишга мажбур этди. Шу жумладан Бухоро амирлиги ва БХСРнинг иқтисодий

сиёсатида пул соҳаси ва унда ўтказилган ислохотлар ҳамда банк тизими алоҳида ўрин тутган.

Тадқиқот натижалари. Бухоро амирлигида кредит тизимининг ва нақд пулнинг йўқлиги, маҳаллий савдогарларни оғир аҳволга туширди. Бундан фойдаланиб, амир ўз саррофлари орқали жуда катта фоизда пул бера бошлаган ва буни йилдан-йилга кенгайтириб борган. Бу амирга катта даромад берса-да, савдонинг ривожланишига у қадар яхши таъсир қилмади. Шу боис Бухорода акционерлик банкини очиш борасида таклифлар туша бошлади. Бу масалада оренбурглик савдогарлар 1882 йилда амирга мурожаат қиладилар. Амир бунга хайрихоҳлик билдириб, агар Бухорода банк очилса, 70 млн беришни ваъда қилган. Аммо бу иш узоқ чўзилиб кетади ва фақатгина 1894 йилга келиб, Янги Бухоро (Когон) да биринчи Россия Давлат банки бўлими, 1902 йилда эса мамлакат пойтахти Бухоро шаҳрида Рус-Хитой банки ва Халқаро банк бўлимлари очилади[1]. Шунингдек, Москва савдо банкининг Бухорода бўлимлари 1892 йилда очилган бўлиб, банк ака-ука Поляковлар, П.Стремоухов, В.О.Боланский ва бошқалар томонидан таъсис этилган. Банк турли ширкатлар ва савдо уйлари молиялаштириш асосида кириб келган[2].

Баъзи манбаларда келтирилишича, Бухоро амирлигида Биринчи жаҳон уруши бошланган пайтда Бухоро амирлиги ҳудудида 7 та банк муассасаси: Россия Давлат банки бўлими ва 6 та хусусий банк, жумладан, Рус-Осиё банкининг икки шубаси (Эски Бухоро ва Карки шаҳарларида) бўлган. 1917 йили Бухорода фаолият кўрсатган банкларнинг умумий баланси 58,855 рублни ташкил қилган[3].

Пахта савдоси билан шуғулланадиган кичик фермер хўжаликларини ривожлантириш мақсадида Россиянинг темир йўл бошқармаси ва молия вазирлиги ички пахтачиликни қўллаб-қувватлаш учун Давлат банки томонидан кредитлар беришнинг янги қоидаларини тайёрлаш бўйича ишлар олиб борган. Ҳукумат 1895 йил 3 февралда 72 банддан иборат “Ички пахтачиликни қўллаб-қувватлаш учун кредит бериш қоидалари”ни тасдиқлаган. Ушбу қоидага асосан “Маҳаллий пахтачиликни қўллаб-қувватлаш учун кредитлар бериш қоидалари” тайёрланган. “1895 йил 3 феврал қоидалари” номи билан танилган бу қоида Россия империяси ҳудудида пахтачиликни ривожлантиришга қаратилган бўлиб, кредит билан таъминлаш Россия давлат банкига топширилган.

“1895 йил 3 февраль қоидалари”нинг иккинчи бандига кўра, пахтакорларни айланма маблағ билан таъминлаш мақсадида саноат кредитлари ажратиш кўзда тутилган. Кейинчалик кредитнинг бу турига ўзгартириш киритилиб, 1894 йил 22 июлда тасдиқланган “Қишлоқ хўжалиги кредитлари тўғрисида”ги умумий қоидалар асосида бериладиган бўлган. Унга кўра мижознинг гаров сифатига



берган ер майдонининг ялпи даромади, унга тўланадиган ер солиғи, суғориладиган ернинг миқдори ва бошқалар инобатга олинган. Ўрта Осиё пахтакорларига пахта сотиб олишлари учун 1894 йил 22 декабрда тасдиқланган “Товарларга кредит беришнинг умумий қоидалари”га асосан берилган. Қоидага кўра, кредит фақат шахсий кредит шаклида берилиши, унинг муддати 3 ойдан ошмаслиги, берилган кредит миқдори маҳаллий пахта нархининг 40 фоизидан юқори бўлмаслиги керак эди[4]. Бу қоидага асосан прессланган тоза пахта учун ссуда бериш тартиби ҳам келтирилган ва берилган ссуда пахта савдоси билан шуғулланган савдогарларга пахтани тўплаш (кўпроқ йиғиш) ва уни саноат марказларига етказувчилар учун ажратилган. Ссуда олиш тартибига кўра, ссуда олувчи савдогарга жавобгарликни ўз зиммасига олган завод эгаси ишлаб чиқарадиган пахтанинг сифати ва тури кўрсатилган ҳужжат заводнинг маркаси (белгиси) билан тасдиқлагандан сўнг банк унга кредит ажратган.

Кичик кредит бериш тартиби Бухоро амирлиги ва Хива хонлиги ҳудудида деярли йўлга қўйилмаган. Молия вазирининг руҳсати билан банкларда кичик кредитлар бўлимини ташкил этишнинг мақсадли ва фойдали томонларини ўрганиш учун кичик кредитлар бўлимининг текширувчиси Д.Евдокимов Бухорога юборилган. Бундан ташқари кичик кредитлар менежери Л.С.Баркин, Бухородаги сиёсий агент А.С.Сомов, Россия ҳарбий вазирлиги Бош штабининг Осиё бўлими бошлиғи С.В.Цейллар кредит бўлимларини ташкил этишни илгари сурдилар ва амирликда фаолият юритаётган турли фирма вакиллари иштирокида Бухоро амирлигида Россия Давлат банкининг Бухоро филиали орқали кичик кредит ташкилотларини ташкил этиш борасида йиғилишлар ўтказганлар. Бироқ амир ҳукумати бу ташаббусни рад этган. Чунки кичик кредит ташкилотлари Россиянинг шундай кредитлар берадиган идоралари назорати остида бўлиши назарда тутилган. Д.Евдокимовнинг 1912 йил 21 августда кичик кредитлар бўлимига ҳисобот тақдим этган. Унинг ёзишича, 1911 йилда Вобкент туманида амир ҳукумати томонидан деҳқонларга ссуда берилган. Ссуда бериш тартиби қуйидагича бўлганлиги таъкидланган. Энг юқори ссуда миқдори 75 рубль бўлган ва унинг муддати белгиланмаган. Сентябрь ойида берилган ссуда йиғиб олинган. Кредитнинг бу тури пахтакор учун фойдасиз бўлган. Чунки пахтакорлар пахтани сентябрь ойида сотишни бошлаган[5].

Хуллас, йилдан йилга ўсиб боровчи кичик кредит ташкилотлари фермер хўжаликларини ривожлантириш, уларни судхўрлардан озод қилиш учун катта аҳамиятга эга бўлиши назарда тутилган бўлса ҳам амалиётга бу ҳолат жорий этилмаган.

Россиянинг марказий тижорат банклари учун энг катта қизиқиш

уйғотадиган рақобатбордош товарлар орасида қорақўл тери ҳам бор эди, чунки қорақўл мўйнаси жаҳон бозорида узоқ вақтдан бери машхур бўлиб келган. Бухоро шаҳри қорақўл савдоси марказига айланган. Албатта ушбу операцияларда марказий тижорат банкларининг маҳаллий бўлимлари фаол иштирок этган. Айниқса қорақўл тери савдоси Азов-Дон, Рус-Осиё ва Рус-Хитой банкларининг маблағлари орқали ривожланган. Азов-Дон банкининг Эски Бухорода 51 та қорақўл етказиб берадиган бўлимлари бўлган. Пахта сингари қорақўл тери маҳсулотлари Москва ва Нижний Новгород ярмаркаларида кўпроқ сотилган. Хусусан, 1910 йилда Рус-Осиё банкининг Бухородаги филиалининг маблағи эвазига 329482 дона қорақўл териси сотиб олинди, Марказга жўнатилган[6].

Россия давлат банкининг Бухоро бўлими кенгаши ёзишмаларида таъкидланганидек, Убайдулла Хўжа “Марказий Осиёнинг савдо бозорларини Россия бозорлари билан боғлайдиган асосий бўғин эди”[7]. У пахта ва қорақўл савдоси учун Рус-Осиё банкдан 1909 йилда 530 минг рубль миқдорида кредит олган.

Рус-Осиё банкининг энг йирик мижозлари қорақўл савдогарлари эди. Жўрабек Арабов Бухоро қорақўлининг йирик экспертчиларидан бўлган. Банк менежери 1909 йилда бўлган директорлар кенгашида “Арабов биз учун жуда муҳим ва қадрли мижоз. Биз унинг манфаатини қадрлаймиз, чунки у маҳаллий савдогарларга ҳам, Бухоро ҳукуматига ҳам катта таъсир кўрсата олган. У банк кредитидан камдан-кам фойдаланади. У қорақўл савдосидаги энг катта мижоздир” деб таъкидлаган.

Сибир савдо банки Ўрта Осиёдаги пахта савдосида фаол қатнашган. Хусусан, 1910-1911 йилларда Бухорода тадбиркорлик билан шуғулланган 104 нафар савдогарнинг шахсий маълумотлари тузилган. Уларнинг барчасига банк томонидан 150 минг рублгача кредит ажратилган.

Банкдан кредит олган мижоз тўловни ўз вақтида амалга ошириши шарт бўлиб, агар мижознинг бир ёки бир нечта банк бўлимларидан қарздорлиги аниқланса, қарзни банклар келишган ҳолда биргаликда йиғган. Банклар мижознинг гаровга берган мол-мулкни сотишга ўтган. Мол-мулкни сотишдан тушадиган маблағ ҳам қарзларини фоизлар билан тўлиқ тўлаш учун етарли бўлмаса, қарздорнинг рўйхатида кўрсатилган мулк банк ва фирмалар ўртасида ҳар бирига қарз миқдорига мутаносиб равишда тақсимланган. Шунинг учун банклар мижоз ўртасида қарзини қоплаш учун кўчмас мулкларини гаровга қўйиш тўғрисида шартнома имзоланган. Бу шартнома васиқа дейилган[8].

Банклардан кредит олиш тартиби қуйидагича бўлган: кредит олган шахслардан банк васиқа олган. Васиқа одатда иккита шахснинг гувоҳлигида тўлдирилган. Васиқани қонунийлаштиришда бу ҳужжат сиёсий агент тасдиқлаганидан сўнг қўшбеги томонидан имзоланган.

Аслида бундай хужжатлар жуда кўп бўлганлиги сабабли сиёсий агент васиқани тасдиқлаш ваколатини Бухоро қозикалони ёки раисга топширган ва амир номидан қўшбеги муҳрлаган.

Бухоро амирлигида Рус-Осиё банкининг Карки бўлимида бухоролик савдогар Мирза Исомиддин Мирза Муҳитдинов банкдан олган кредити учун васиқа тўлдирган. Васиқада ёзилишича: “Мен Бухоро шаҳрида жойлашган Ҳаммоми Кунжак маҳалласидаги уйимнинг  $\frac{3}{4}$  қисмини ташқи савдо учун қисқа муддатда 10000 рублга банк ҳисобига (гаровга) топширдим. Мен ўзим тўлиқ эгалик қилаётган 15 таноб хур ерларимнинг ярмини, Қизилтепа станцияси ва Коми Абумуслим[9] тумани (ҳозирги Қизилтепа тумани ҳудуди)да жойлашган пахта тозалаш заводларимни Россия Ташқи савдо, Рус-Осиё ва Москва ҳисоб банкига қисқа муддатда 100 минг рубль учун гаровга бердим”. Яна бир савдогар Иноятулла Хўжа Бақохўжаев ҳам Рус-Осиё банкдан олган кредити учун васиқа тўлдирган. Васиқада шундай ёзилган: “30 таноб ернинг (30 таноб ерни ичига Зарафшон дарёсининг жанубий қисмида жойлашган Тош-Буқа ҳудудидаги 27 таноб хирож ерлари ҳам кирган)  $\frac{1}{6}$  қисмини 2500 рубль маблағ учун гаровга бердим. Мен бу маблағни 19 ой (1 йилу 7 ой) муддатда тўлашни ўз зиммамга оламан”.

Амир Саид Олимхон рус фирмалари билан ҳам ҳамкорлик қилган. Йирик рус ширкатларидан бири “И. Г. Стахеев и К<sup>о</sup>” савдо-саноат ширкати 1916 йил октябрь ойида Бухоро ҳукуматига “Бухоро мулклари таркибида фойдали ишлаб чиқаришни ташкил этиш ва қулай савдони ривожлантириш билан шуғулланиш тўғрисида”ги таклиф билан чиқди. 1916 йил 15 ноябрда Бухоро амира Саид Олимхон ширкат билан биргаликдаги ҳамкорлигига розилик олгач, шерикчилик асосида 15 пунктдан иборат шартнома имзоланди. Шартномага кўра, шерикчилик фаолияти ҳеч қандай монопол характерга эга эмаслиги қайд этилган[10].

1916 йилда ширкат Рус-Осиё ва Петроград халқаро тижорат банклари билан Рус-Бухоро банкни ташкил этиш бўйича музокаралар олиб борди. И.Стахеев 1917 йил сентябрда Россия Муваққат ҳукуматидан Рус-Бухоро банкни ташкил этиш ҳуқуқини олди. Янги банк Бухоро шаҳрида фаолият юритаётган Рус-Осиё банкининг бўлими негизида пайдо бўлди.

Ушбу банкнинг устави 1917 йил 22 августда Россия Молия вазирлиги томонидан асосий капитали 5 млн рубль капитал билан тасдиқланди. Банк кенгаши Петроград (ҳозирги Санкт-Петербург) шаҳрида жойлашган. Банк акциялар чиқарган, уларнинг ҳар бири 34 рублдан баҳоланган. Банкнинг баъзи акциялари турли муассасалар томонидан сотиб олинган. Бироқ банкнинг асосчилари И.Стахеев ва Амир Саид Олимхоннинг мақсадли режалари амалга ошмаган. Большевиклар

ҳокимиятни босиб олишгач, совет Россияси ҳукумати 1917 йил 14 декабрдаги фармони билан барча рус банкларини, шу жумладан, Рус-Бухоро банкини ҳам миллийлаштирди.

1917 йилдан кейин Россия банкларининг Бухородаги фаолияти деярли тўхтаб қолган. Натижада бу ерда судхўрлик (катта фойда эвазига қарз бериш) кучайган. Судхўрлик шариятга зид бўлган. Ҳинд судхўрлари ва бошқалар (масалан, Бухоро яхудийлари)–судхўрлар табақаси 1917-1920 йилларда оғир иқтисодий турмуш кечираётган Бухоро деҳқонлари ва хунармандларига катта фоиз эвазига қарз бериб, ўз бойликларини оширганлар. Бухоро халқи улардан кўп жабр чеккан.

Бухорода республика тузуми ўрнатилгач (1920 йил сентябрь), янги ҳукумат олдиға банк ишларини бутунлай янги асосда ташкил қилиш вазифаси турган. Бухорода банк ишларини ривожлантириш жуда қулай ва ўнғай бўлган. Чунки шаҳар ва қишлоқ аҳолиси, хусусан, деҳқонлар ўртасида банк сармоясига талаб жуда юқори эди.

1920 йил кузида Бухоро шаҳрида Марказий халқ банки иш бошлаган. Унинг ихтиёрига БХСР ҳукумати томонидан тегишли маблағ ажратилган. Тез орада Марказий халқ банкининг БХСР вилоятлари ва шаҳарларида шуъбалари ташкил қилинган. Масалан, 1921 йил 1 январдан бошлаб Қарши вилояти шуъбаси ўз фаолиятини бошлаган. 1921 йил ёзида Термиз ва Карки шаҳарларида ҳам Молия назорати томонидан Марказий халқ банкининг шуъбалари очилади[11].

Архив ҳужжатларида келтирилишича, БХСРда Ўрта Осиё Қишлоқ хўжалик банки томонидан 1923 йили 14 та, 1924 йил 50 та, 1924 йили 1 июл ҳолатида ҳаммаси бўлиб 64 та қишлоқ хўжалиги ширкати кредитлари очилган. 1924 йилнинг охирида уларнинг миқдорини Фарбий Бухорода 68 та ва Шарқий Бухорода 12 таға етказиш мўлжалланган. Деярли барча қишлоқ хўжалик ширкати кредитлари асосан, пахтачилик туманларида (Шарқий Бухородан мустасно) очилган. Ўрта Осиё Қишлоқ хўжалик банкининг Бухоро бўлими 54 ширкатга 519 минг рубль кредит ажратган. Бу ширкатларга ажратилган маблағлар ҳисобидан 1924 йили Давлат пахта қўмитаси томонидан 25 минг таноб ерга Америка пахтаси экилган[12].

Шунингдек, Ўрта Осиё Қишлоқ Хўжалиги банки камбағал деҳқонлар ва хунармандлар (тўқувчилар, кўнчи, темирчилар) учун ҳам кредит ажратган. Бир кишига бериладиган ўртача кредит (қарз) миқдори 100 червон рублни ташкил қилиб, ундан Қишлоқ хўжалик банки ҳисобига йилига 12%, Қишлоқ хўжалик банкининг кредит ширкатлари ҳисобига йилига 4% фойда ундирилган.

ХУЛОСАЛАР. Хулоса қилиб айтганда, Бухоро амирлигида XIX асрнинг охириларидан бошлаб ташкил топган турли банклар фаолияти



муҳим аҳамиятга эга. Асосан Россиядаги турли банкларнинг бўлимлари сифатида тузилган бундай банклар амирлик иқтисодиётини кўтаришда, саноат корхоналарини ташкил қилиш ва жиҳозлашда, маҳаллий сармоядорлар билан рус тадбиркорлари ўртасидаги турли молиявий алоқаларда катта роль ўйнаган. Ҳатто Бухоро амирининг ўзи банклар хизматидан фаол фойдаланган. Бухоро Республикасидаги банклар фаолияти ҳам диққатга сазовардир. Ёш давлатда илк бор янги асосда ташкил қилинган банклар энг аввало деҳқонлар, ҳунармандлар ва савдогарлар манфаатини ҳимоя қилган. Давлат банклари билан бир қаторда тижорат, қишлоқ хўжалик, коммунал банклар ва бошқа миллий банклар фаолият кўрсатганлиги бугунги кун учун ҳам ўрнатилган бўларли ҳодиса ҳисобланади.

Фойдаланилган адабиётлар рўйхати

1. Новая бухара // “Русский Туркестан”. №90. 24 января 1899 г.
2. Узбекистон миллий архиви, И-1-жамғарма, 27-рўйхат, 425-иш, 2-варақ.
3. Ўзбекистон миллий архиви, 50-фонд, 1-рўйхат, 5-иш, 235-236-варақлар.
4. Хотамов Н.Б. История банков и предпринимательства в Средней Азии (60-е годы XIX в. – 1917 г.) – Душанбе.: “Эр-граф”, 2014. – С. 184.
5. Местный хроника // “Закаспийское обозрение” (Асхабад). № 28. 4 февраля 1901 г.
6. Нормуродова Г. Бухоро амирлиги ижтимоий стратификацияси ва аҳоли қатламларининг жамият ҳаётидаги ўрни (1868-1920 й.). – Тошкент: “Наврўз”, 2019. – Б.160.
7. Гаффоров Н.У. Формирование национальной буржуазии в Бухарском эмирате // Вестник ТГУРБП (Худжанд). 2011. №4(48). – С.182.
8. Хакимова К.З., Кравец Л.Н. Социально-экономические отношения и классовая борьба в дореволюционном Узбекистане (конец XIX – начало XX в.). Ташкент: “Фан”, 1980. – С. 84.
9. Ражабов Қ., Мақсудов Р. Қизилтепа тумани. – Тошкент: “Muharrir”, 2011. – Б.220.
10. Хотамов Н. Роль банковского капитала в социально-экономическом развитии Средней Азии (начало 90-х гг. XIX в. – 1917 г.). – Душанбе: “Дониш”, 1990. – С.64.
11. Ражабов Қ. Бухоро Халқ Совет Республикасида банклар фаолияти (1920-1924 й.) // “Бозор, пул ва кредит (БПК)”. – Тошкент. 2021. №6. – Б. 25.
12. Ўзбекистон миллий архиви, 50-фонд, 1-рўйхат, 24-иш, 60-варақ.